

GIRINGIYA KEVNEŞOPIYA SINET Û KIRÎVATÎ YA EZDAHÎTÎ YÊ

Gava ez bala xwe didime nav çapemenî û zargotina me Kurdan, dibînim ku gelek dîtin, serpêkhatî û agehdarî li ser **giringiya kevneşopiya sinet û kirîvatîyê** hatine gotin û nivîsandin.

Mixabin hinek kesên xerîb û Kurd, ku ji wan anjî ji xwe re dibêjin, “zaniyar, lêkolîner, nivîskar û hwd.” di mediya û çapemeniyê de, gelek gotin û buyerên bê bingeş(derew.û hwd.) li ser bingeşên bawerî û çanda me Kurdên resen, û bi taybetî jî li ser kevneşopiyên Ezdahîtiyê sergêjî belakirine û vêga hêjî gelek ji wan ji bo berjiwendiyên rêxistin û kesayatiya xwe naxwazin dilê kes, nas û dostên gelê me xweş bikin.

Mînakek:

Em binêrin li wan „agehdarî“, „tespît“ û „çareseriyên“ku berpirsyar û pisporên dewletên hevgirtî, di peymanê Lozanê(24.07.1923) de li ser bawerî û çanda me Kurdên resen erê kirine. Bi peymanên weha gelek dewletê diz û derewînan, li ser înkariya Kurd û Kurdistanê hatine damezirandin.

Ji xwe min di hemû gotarên xwe, “ [mitoloji-u-diroka-kurden-resen.](#)“ û hwd.de eşkere kiriye û di gelek mînakên dinê de jî xwanê dibe ku, dagirkerên welatê me û hevalbendên wan(hinek kesayetên Êzdiyan jî) her wextî ji bo berjiwendiyên xwe rastiya kevnariya kevneşopên me veşartine. Ew vêga hêjî welatperwerî û fedekariya me Êzidiyan, ya ji bo parastina çand û ola Mezopotamyayê herî kevnare vedişêrin, naxwazin zanîn û agahiyên zaniyar, rewşenbîr, nivîskar, berpirsyarên mal, komel, ol, çande, partî û rêxistinên Kurdî di der heqê diroka olên li Kurdistanê û bi taybetî jî li ser Ezdahîtiyê û rewşa civakan me Êzdiyan ya derbas buyî û ya niha hêjî heyî de sererast û zêde bivin. Nasnama me tu carî nasnekirine, nexwastine û naxwazin ku ciwanên me diroka serpêkhatî û kevneşopên bav-kalên xwe nasbikin.

Încar, ji bo ez bikaribim dîsa hinek ji van sergêjî, agehdarî, gotin û buyerên bê bingeş(derew.û hwd.) sererast bikim û bi taybetî jî di vê gotarê de rewşa **kevneşopiya sinet û kirîvatîya me Êzdiyan ya vê dema ku em niha tê de zindî dijîn**, dîsa li goriya Êzdînasîn, serpêkhatî û dîtinên kesayeta xwe ji we hêjayan re bidime xwanê.

Bi dîtina min, kevneşopên me Ezdahîyan di nav çand û olên Mezopotamyayê de gelekî kavî û resenên. Çi gava ku meriv xwe ji bo zanîna afirandinê, kevnarî û rastiya diroknivîsê û kevneşopan berde nav kuraya ilmê Ezdahîtiyê, merivê hingê bivîne û fahm bike ku, sinetkirin jî yek ji erkê dîne civaka me yê herî kevnê. Wê ji meriv ra gelekî zelal eşkere bive ku, kevneşopiya sinet û kirîvatîya Ezdahîtiyê bune bingeşa gelek bawerî, rêûresmên netew û olên li ser ruyê vê cîhanê hene. Wê kifş bive, piraniya wan ol û gelên ku xwe mîna yê herî “kevn” û “mezin” didine xwanê, hêjî weke me Kurdan vê kevneşopiya kevnar di nava bawerî û çanda(sed û hedên) xwe de xwedî dikin. Lewma jî axlebên wan vêga hêjî weke me Êzdiyan zarokên xwe yê kur-law ji vê kevneşopiya kevnar bêpar nahêlin.

Gelek ji xwandevarên birêz dizanin ku, min li ser vê giringiya kevneşopiya sinet û kirîvatîya me Êzdiyan, di rûpelên(104-107) pirtûkeke xwe(Çavk.:1) de bahs kiriye û gotiye:

“Ji hingava sinet li ser ruyê erdê peydabuye û heta vêga em Êzdî qedir û qîmetekî mezin didine sinet û şahiya kirîvatîyê. Ji bo kirîvatîya me Êzdiyan timî pîroz bimîne, bav-kalên berê tenê şexsekî dûnav(şêx, feqîr, pîr, merebî, qewal, koçek, pêşîmam û whd.)ê xwe dixistine kirîvê xwe yê xwîne. Ev kevneşop û kiryarên bav-kalê me yê berê, ji me ra didine xwanê ku, sinetkirin jî erkê dîne civaka me yê herî kevnê. Lê, ji ber di van demên paş de, hingê ku dujmanantî û dujwariya li ser Êzdiyan zêde dibû û Êzdiyan hew dikarîbûn xwe bi tenê ji wan bela û teşqelan biparêzin, ew mecbûr dibin êdî merivên ne ji dîne xwe jî bikine kirîvên xwe yê xwîne. Wekî dinê jî, parastina

kevneşopiya sinet û kirîvatiyê gelek caran di nav eşîran anjî dû dilmayîyan û civakan de jî piştgiirtiya aşîfî û azadiyê xwirtir kiriye.....

Lewma, em Êzdî vêga hêjî dibêjin, gava zarok di dawa kirîvan de hate sinetkirin û dilopek xwîna kurikê tê sinetkirin gehîşte ser bedena kirîvê wî, êdî xwîna meriv û kirîvên meriv dibe yek. Ji vê buyera pîroz û şunde, êdî kirîv hew navên hevûdinê hildidin, tenê ji hevûdinê re dibêjin, kirîva anjî qerîbê. Meriv û çiqas malbata kirîvê xwe ji hevûdinê re dibe weke xwuşk û bira. Lewma jî, êdî gerek meriv bi xizmê(malbata) kirîvê xweyî xwînê re tûcarî nê zewice. Dizî û xayîntiyê bi kirîvan re neke. Mal û neferên kirîvan jî weke yên şexsê xwe biparêze. Çi wexta ku kirîvên xwînê ji bo daxwazî û tiştêkî hatine mala meriv, divê meriv wan vale venegerîne.

Di nav kultura me de, giringiya sinet û kirîvatiyê gelek caran buye sembola hevgiirtin, wekhevî, hevaltî û biratiya endamên civak û netewên cûde jî..... “berdewam dike (1).

Belê ji xeynî van daxwaniyan, ez dikarim çend mînakên ji piratik, dîtin û serpêkhatiyên xwe jî weha bidime xwanê:

Kirîvatiya me ya bi dûnavên Êzdî re

Dema ez di sala 1973 de ji ber neheqî û zordariya ku di herêma bajarê Sêert, Qubîn û Batman ê de li me Êzdiyan dibu, reviyam çume herêma bajarê Wêranşehîr ê bixwînim, rojekê Xwedê jê raziyê Şêx Birahîmê Şêx Mihê (Hezarê-Mutlu) hat ez birime mala xwe gundê Mozikê Êzedîn.

Ya rast hingê temenê min hivde salî bû û min baş nizanîbû ka em û van şêxan ji kurê hevûdinê nasdikin. Ji xwe min hingê gelekî ji kevneşopên Êzdiyatîyê jî zêde fahm nedikir. Lê, rahmetiyê Şêx Birahîmê Hezarê, şêxekî ji binemala şêxên Şêşims e û ji malbata Şêx Miçoyê Şêx Îsa (*ev jî yek ji lehengê şerê Delanê yê sala 1830 de buye. Binêrin, li strana şerê Şêx Miçoyê Îsa û Keşîş Polo, di çavkanî 2. Rûpel:56-60 -.)* yê, baş dizanîbû ku ez kurê kî me.

Gava ku Xwedê jê raziyê Şêx Birahîm, ez gelek caran birime mala xwe û pêve, êdî ewî gelek buyerên koçberî û serpêkhatiyên kesayetî û malbata xwe ji min re gotin. Ji min re tekûz kir ku hêja bapîrên wî(Şêx Mîrzayê Eysê) û bapîrên malbata me di gundê Şimzê de û bihevûdinê re bûne kirîvê xwînê. Lê, bapîrên wî û ew jî ber zilm û zordariya ku nijadperestên Tirk û paşweryên Kurdan ku li kurdên Êzdî dikirin, mecbûr dibin dev ji mal û milkên xwe yên di gundên Ridwan, Kuşana, Şimzê, Mêlha, Çetelê, Duşayê, Xanikê û hwd., berdin. Lewma jî pêwendiyên wan û yên me kirîvên xwînê ji hevûdinê qutbûne....

Wexta ez di dema betlana dibistanê de diçûme malê û dihatim pêve, êdî pêwendiyên Şêx Birahîm û bavê min Elî Tolan jî bihevûdinê re gurtir bûn. Di pey re ewan cardinê xwastin ku em kirîvatiya xwe sax bikin. Lewma jî, Xwedê jê raziyê Şêx Birahîm rabû kurê xwe yê bi navê Elî di dawa rahmetiyê bavê min Elî Tolan de û nebiyê xwe rahmetiyê Emîn, yê kurê kirîvê Evdo jî di dawa min de sinet kirin.



Wexta zarokên min û rahmetiya Xanim çêbûn, me jî di sala 1982 de Şêran, Dewran û Heyam di dawa kirîvê Evdo û Elî (*kurên Şêx Birahîmê Şêx Mihê ne*) de sinet kirin.

Piştî çend salan, dîsa kirîvê Evdo û qerîba Rindê kurê xwe yê bi navê Tahsîn di dawa min de, di sala 2001 de kirîvê Mirad û qerîba Gulê kurê xwe Serhat(*nebiçîrkê rahmetiyê kirîvê Şêx Biraîm û nebiyê rahmetiyê kirîvê Mîrza*) di dawa birayê min Îskan de, di sala 2007 de kirîvê Fexrî (*kurê rahmetiyê kirîvê Mîraza*) û qerîba Şikriya kurê xwe Viyan di dawa Heyam de, kirîvê Mirad û qerîba Gulê kurê xwe Şêran di dawa Şêran de û kurê xwe Serhat jî di dawa biraziyê min Emîn(kurê birê min Hiseyin)de sinet kirin

Şikir ji Xwedê re, ev kirîvatiya me û van Şêxên ji binemala şêxên Şêşims hêjî bi hezkirin têye parastin û berdewam dibe.....

Kirîvatiya me ya bi hevalê me re

Kurê min Şêran hêja di zarokiya xwe de gelekî hez ji hevalê xwe Elî(kurê Kazim û Xatun) **Eryaşar** dikir. Baweriya dê û bavê Elî bi Elewîtiyê tê. Li goriya dîtina min, piraniya bapîrên bawermendên Elewîtiyê jî mîna yên me Êzdiyan Kurdin. Lewma jî dê û bavên Elî, vêga hêjî weke me bi Kurdî dizanin. Ji xwe min di gotareke xwe de jî daye xwanê ku "[*Em Kurd tev mina sêvên ji darekê ne ...*](#) „

Elî û Şêran ji bo hezkirina hevûdin û berdewama hevaltiya şêrîn, bext(wahd, ad, soz) dabûne hevûdinê û gotibûn , “wexta em bizewicîn û zarokên kî ji me yên kurik çêbive, emê lawê xwe di dawa hevûdinê de sinet bikin(yanî bivine kirîv-“musahib” ê hevûdinê)”.

Wisa çêbû ku, Şêran beriya Elî zewicî û dûre Xwedê di 25.10.2008 de kurikek da Şêran û pîreka wî Qeder. Vêca, Şêran ew sozê ku dabû hevalê xwe Elî anî cîh, kurê xwe **Kiyan** di 26.04.2009 de, didawa hevalê xwe Elî de sinet kir û ewan dûre jî di roja 30.08.2009 de tevî kesên malbat, nas û dostên xwe şahiya **SINET Û KIRÎVATÎ – “MUSAHİB”** ya xwe pîroz kirin.

Şikir ji Xwedê re û ez zahf dilxweşim ku, îro gelek ciwanên Kurd yên mîna ŞÊRAN û ELÎ ku, hêja cîh-warên bav-kalan bi çavên xwe ne dîtine, li xeribiyê çêbûne û dijîn, bê rêxistin û piştgiriya mal anjî komelan û tenê bi alîkariya perwerda ji dê û bavên xwe girtine, dikarin van kevneşopiyên çanda Ezdahîtiyê (gelekên mîna: SINET KIRIN, KIRÎVATÎ, “MUSAHİB”, BISK HILANÎN û hwd.) berdewam bikin.

Ez ji Xwedê lave dikim, ku ew temenekî dirêj û tendûristiyeke serkevtî bide ciwanên Kurd, ciwanên me, ew jî bikaribin dipêşerojê de bi serfirazî hemû erkên xwe bînene cîh û weke min berdewama van kevneşopiyên birûmet li cem nebiyên xwe bivînin !

Keremkin li çend wênên şahiya **SINET Û KIRÎVATÎ – “MUSAHİB”** ya nebiyê min **KIYAN** binêrin.







Spas ji bo beşdarbûna birê Dr. Eskerê Boyik û Dr. Zerdeşt Haco, hemû neferên malbatê, zeyî, pismam, şêx, kirîv(musahib), qerîb, nas û dosten me.

Kemal Tolan

Çavkanî :

1. Nasandina Kevneşopên Êzdiyatîyê, Weşanên Perî- Çileyêpêşîn 2006 Stenbol.
2. Hebûn û Tûnebûna Êzdiyan Tev Romanên Zindîne, Weşanên DENGÊ ÊZDIYAN 2000 – Almaniya/ Oldenburg.